



Economia anter identità e crisa globala

A coordinèr l'endrez de l'event una ladina, Marilena Defrancesco da Moena

Identità e globalisazion. Podessa esser l titol de n convegn olache se reiona de mendranzes, del valor del particular te n mond semper più valif. Ma chest l'è ence l tem del festival de l'economia 2009 che se tegnà a Trent dai 29 de mé al prum de ju-gn. F'èr passenèr identità e globalisazion te n temp de crisa olache l mond à lascià de corer e l somea

jir de zeruch. "Canche per egn l'economia mon-diela, disc l responsabol del festival Tito Boeri, crescea con n tas del 5-6 per cent a l'an muie se do-manèa se la globalisazion aessa sofoà identità, cultures, valores e tradizions locales per lascèr la soramessa a la globalisazion. Ades sion te dant a n problem che l'è dut autramenter.


Cognon f'èr i conts co na crisa globala che padesc la crescimo-nia de identità locales che se pala de contra a dut chel che l'è al defora de sie teritorie. "Chela parola glocal, che jia tant de moda enscin a pech temp fa la somea aer perdù pèrt de sia beleza. "Averc al mond ma se-gures e forc de noscia tradi-zion." I slogan desche chest do-venta fiegoi e vegn inant la voa de vardèr de più a chel che l'è vejìn e che se pel tocèr con man.

"La relazion anter global e lo-cal, seghita **Tito Boeri**, se fèsc amò più strenta ajache la politi-ches di singoi pajjes con f'èr i conts co na crisa che vegn da dalonc. Ma la piora lezion che se pel emparèr da chest temp miser l'è che la crisa é fia de la globalisazion e che donca per se n varder da de neves l'è miec lurèr per enseveèr ite noscia pi-cola comunanzes."

Apede a chest raport de veji-nanza anter identità e globali-sazion l festival chierirà ence de jir più a fon te la tratazion de la caujes che à fat creper fora che-sta crisa economica de livel mondièl.

L'è da capir coche la é stata che i economisc' i no l'à anunzièda dantfora e perché muie de ban-ches à podù f'èr chel che les à volù per egn e anorum zenza che nesciugn dijesse nia e per-ché la politica se à descedà fora e l'à metù man coscita tèrt.

Na lingia de argomenc de gran interess che vel rejonèr de eco-nomia no demò a la jent studiè-da ma che met al zenter apontin l conzet che l'economia é de duc e duc cogn poder tor pèrt. Ma esser populères no vel dir f'èr la robes presciapech. **George Akerlof** e **James Heckman** l'è i doi premi nobel che à tout sù



Marilena Defrancesco P.A.T.

l'envit e che i sarà a Trent per l festival. Akerlof, nobel per l'e-conomia tel 2001 e professor a la **Università Columbia** te la Ca-lifornia, rejonarà en vender ai 29 de mé da les 18.30 da sera te la Sala Depero de la provinzia con n referat dal titol "**La natura umana e i sistem economic**". Vegnarà rejonà de la mencian-za de fiduzia da man de la jent a la basa de la crisa e de chel che i goernes pel f'èr per vegnir fora da chesta situazion.

Ma a averjer l festival 2009 sarà en vender 29 da les 15.00 un au-ter american, James Heckman, premio nobel tel 2000, che rejo-narà de coche se enterza eco-nomia e psicologia, na cobia che l'è la chief per capir e ente-ner noscia personalità. Apede ai doi premi nobel che à sotris-sà la gran emportanza de l'informazion che é a la basa de vigni dezijon economica, dai 29 de mé al 1 de jujn te la Trent economica sarà dut un jir e ve-gnir de studiouse e economisc' de nonzech nazionèl e interna-zionèl. Te dedò al festival l'è n aparat organisatif dalbon gran

e che, neva curiosia, reiona la-dina ajache a coordinèr l'en-drez l'è **Marilena Defrancesco** da Moena, responsabola di gre-gn evenc de la Provinzia de Trent.

Più avisa che encèria portède inant per l festival?

Chesta per me l'è la quarta edi-zion e donca dal 2006 son re-sponsabola de la segreteria or-ganisativa del festival.

E' l'encèria de portèr inant dut l'endrez da chel che vèrda l ge-dèr alberch ai relatores, en-drezèr la sales la piazes olache se tegn l festival e l coordena-ment de dut l program che ro-dola dintorn a l'event, conzerc, mostres e auter.

Cotanta jent laorela con vo?

Che laora demò per chest per più meisc a l'an sion de diesc, dapodò l'è tanta outra jent che ne da na man. No se lascia mai sù deldut via per l'an, a la fin del festival aon da f'èr a tor su dac e meter via e da setember e otober se pea via a meter jù l program per l'an do.

Che edizion ve spetède?

Se speton na edizion enteres-santa tant dai temes che vegn tratà e soraldut te chest mo-ment de crisa i temes se palesa muie atuèi e peisse che sarà en-ce na gran partecipazion de pu-blich.

Mingol de numeres per de-schiarir la graneza del festival?

Senester e miec no f'èr stimes ma pisson che posse ruèr anter le 40-50 mille jent ence se l'è na di de manco respet a l'an passà. Aldò de na speisa de zirca un milion de euro, per la maor pèrt scioldi che va a firmes del post, n studie de l'Università perveit vadagnes per 2,3 milions de eu-ro e chest me sà ja n belebon re-sultat.